



Conférence Episcopale du Rwanda
Commission Episcopale pour la Pastorale des Jeunes, C.E.P.J.
C/o Cité des Jeunes "Nazareth" de Mbare
B.P. 66 Gitarama - Tél. : (250) 562 253 - E-mail : ccepj@yahoo.fr

IBARUWA NYIRUBUTUNGANE PAPA FRANSISIKO YANDIKIYE URUBYIRUKO IGIHE YASHYIRAGA AHAGARAGARA INYANDIKO ITEGURA INTEKO RUSANGE YA 15 YA SINODE Y'ABEPISIKOPI

Rubyiruko nkuda,

Mfite ibyishimo byo kubamenyesha ko mu Kwakira 2018 hazizihizwa Sinode y'Abepiskopi ifite iyi nsanganyamatsiko « Urubyiruko, ukwemera n'ishishoza mu muhamagaro ». Nashatse ko mwakwitabwaho by'umwihariko kuko mbahoza ku mutima. Ubu dushyira ahagaragara iyi nyandiko, turifuza ko yabayobora, ikabamurikira muri urwo rugendo.

Ndazirikana amagambo Imana yabwiye Abrahamu iti : « haguruka uve mu gihugu cy'ababyeyi bawe ujye mu gihugu nzakwereka » (Int 12,1). Ayo magambo ni namwe abwirwa ubu. Ni amagambo y'Umubyeyi ubatumira mu buzima buri imbere butazwi ariko burimo ibikorwa byizewe, we ubwe azabaherekezamo. Ndabasaba gutega amatwi ijwi ry'Imana ribahamagara mu mitima yanyu binyuze mu mwuka wa Roho Mutagatifu.

Igihe Imana yabwiraga Abrahamu iti « haguruka ugende » yashakaga kumubwira iki ? » Mu byukuri ntiyashakaga kumubwira kujya kure y'abe cyangwa y'isi. Byari umuhamagaro ukomeye wamusabaga gusiga byose akajya ku butaka bushya. Kuri twe ubu ubutaka bushya ni ubuhe, niba atari umuryango mugari w'abantu mwumva mushaka cyane, umuryango wuje ubutabera n'ubuvandimwe, umuryango mwumva mwakubaka kugeza ku mpera z'isi ?

Gusa birababaje ko ubu « Haguruka ugende » bivuga n'ibindi birimo gukoresha nabi ububasha umuntu afite ku bandi, kurenganya abantu n'intambara. Muri mwebwe, urubyiruko rwinshi ruhura n'ibibazo byo guhohoterwa rukabona ko rugomba guhunga ibihugu byababyaye. Imiborogo yabo igera ku Mana, nk'iy'umuryango wa Israheri igihe wari mu bucakara kwa Farawo (Iyimukamisiri 2,23).

Ndifuzza kandi kubibutsa kandi amagambo Yezu yabwiye intumwa we umunsi umwe igihe bamubazaga bati : « Mwigisha utuye he ? » Yarabasubije ati : « nimuze murebe. » (Yn 1, 38-39)

Rubyiruko nkunda, Namwe Yezu arahindukira akabareba akabasaba kumugana. Rubyiruko nkunda, mwaba mwarabonye iyo ndoro ? Mwaba mwarumvise iryo jwi ? Mwaba mwariyumvisemo icyo kibatsi kibajyana mu nzira ze ? Ndemeza ko n'ubwo isi yuzuye ugushidikanya, uwo muhamagaro ukomeza kuzura umutima wanyu kugira ngo uwukingurire ibyishimo byuzuye. Ibyo bizashoboka igihe muzaba muherekejwe n'inararibonye, muzashobora gufata urugendo rwo gushishoza kugira ngo mubone umugambi Imana ifitiye ubuzima bwanyu. N'ubwo inzira yanyu yuzuye ubukene no kugwa, Imana yuje impuhwe ibahereza ukuboko kwayo ngo ibagandure.

I Cracovie muri Polonye, igihe nafunguraga ku mugaragaro Umunsi Mpuzamahanga w'Urubyiruko uheruka, nababajije incuro nyinshi nti : « Umuntu ashobora guhindura ibintu ? » Mwasubizanyije umurego muvuga muti « Yego » Iryo jwi ryavukiye mu mitima yanyu y'urubyiruko itihanganira ukurenganya abantu n'umuco w'ibisigazwa no kuba ba ntibindeba. Mutege amatwi ijwi rituruka mu nkingi z'umutima wanyu. N'igihe mwaba mutiyumvamo ubunararibonye kuko mukiri bato nk'umuhanuzi Yereimiya, Imana ibashishikariza kujya aho ibatumye « ntukagire ubwoba na buke... kuko ndi kumwe nawe kugira ngo ngutabare » Yr 1,8).

Isi nziza kurushaho izubakwa na none n'umuganda wanyu, n'ugushaka guhindura ibintu kwanyu n'ubuntu bwanyu. Mwigira ubwoba bwo gutega amatwi Roho ibabwiriza guhitamo mushize amanga, mwigereza igihe umutimanama wanyu ubasaba gutinyuka gukurikira Umwigisha. Kiliziya yumva ishaka kumva ijwi ryanyu, kumva uko mubona ibintu, kumva ukwemera kwanyu, ugushidikanya kwanyu n'uko mubona ibintu. Nimwumvikanishe ijwi ryanyu, nimuryumvikanishe mu miryango mubamo kandi murigeze ku bashumba banyu. Mutagatifu Benedigito yasabaga abapadiri kubaza urubyiruko mbere yo gufata ibyemezo byose bikomeye kubera ko kenshi Imana ihishurira igikwiye umuto muri bose. (Amategako ya Mutagatifu Benedigito III,3).

Ku bw'ibyho, mu rugendo rw'iyi sinodi, abavandimwe banjye Abepisikopi nanjye dushaka kugira uruhare mu byishimo byanyu (2Kr 1, 24). Mbaragije Umubyeyi Bikira Mariya w'i Nazareti urubyiruko nkamwe Imana yarebanye urukundo kugira ngo abafate ukuboko abaganishe ku byishimo bya « Ngaha ndaje » yuzuye kandi izira uburyarya. (Lk 1,38).

Mbikoranye urukundo rwa cyibyeyi.

Papa Fransisiko

Bikorewe i Vatikani, kuwa 13 Mutarama 2017.